

# O LE SULU SAMOA



EKALEZIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA NOVEMA 2024

FAAU'UGA KOLISI FAAFAIFEAU MALUA 2024



*Rev. Karanita Petaia, Rev. Dr. Arthur Wulf (Sui Pule), Rev. Professor Dr. Vaitusi Nofoaiga (Pule KFM)*

**FEAGAIGA & MAOTA FOU I SINAMOGA**



*Rev. Falesefulu & Ve'a Falesefulu*



*Le Maota Fou Faafeagaiga Sinamoga*

---

## **O LE FAASINO UPU**

1. OLE LAUGA.....2
2. TUMAUI FOLAFOLAGA.....3
3. OSI FEAGAIGA EFKS SINAMOGA.....4
4. FAAU'UGA MALUA 2024.....5
5. VASEGA FAAU'U MALUA 2024.....6
6. FAIGA TAULAGA ....8
7. TAAVALE FOU...8
8. GALUEGA EFKS MANUREWA....9
9. FEAU OLE ASO...9
10. PEROFETA MULIMULI.....10
11. O E UA MALILIU.....14
12. ATA O MATAUPU LOMIA.....16

---

## **O LE LAUGA**

Tusi Faitau: Mataio 15: 21 – 28

Matua: Mataio 15: 26 – 28, “*Ona tali atu lea o ia, e lē tatau ona ave le mea e ‘ai a le fanau, ma lafo i ulī. Ona fai mai ai lea o ia, “Le Alii e, e moni a oe; a e ui i lea, ua aai e ulī o momoi mea ua pa’u’ū i laulau a o latou tāula.” Ona tali atu ai lea o Iesu, “Funa e, ua tele lou faatuatua; e pei o lou mana’o, ia faapea lava ona faia ia te oe.”*”

Manatu Autu: **O LE FAFINE KANANA, LE FA’AA’OA’OGA SILLI, I LE SAILIGA O LE MEA MONI. (The Canaanite Woman, o role model in seeking justice).**

- O le sailiga o le mea moni, le mea tonu ma le sa’o, o le manulauti lena o tulimata’i e soo se tagata soifua, i le olaga ma soifuaga o tatou i ai nei.
- O le sailiga o le potu, le mea moni lava o fia maua, e ala ai ona ave e matua fanau i a’oga-O le sailiga e le faigofie; auā e le gata ina alu ai le taimi, a o le malosi foi. O le sailiga foi e ootia ai lagona ma mafatia ai le loto, ona o le tele o faigata ma toatuga e fetai ai i le sailiga.
- A o le tagata onosai lava ia ma talitiga, ona o le faatuatua ma le talitonu faamaoni o lona loto, i le mea o sailia, o le a le pine foi ona ia maua.

- O foliga na o iloa mai le tala o i ai i le Tusi faitau. O le tala ua tau soo ane ai le faitau. Le fafine Kanana sa faalava ane i Turo ma Saitonu, o aai ua oo atu i ai Iesu ma ona soo.

E leai ni faamaumauga tau le soifua kerisiano o le fafine o ta’ua i le tala. A e lē faigata ona tatou iloa, o le fafine e talitonu ia Iesu. O loo iloa i lana valaau, “*Le Alii e, le Alo o Tavita.*” O le faalaniga o ta’u mai ai, o loo iloa e le fafine, o le Mesia lea ma le Faaola, e tupuga mai ia Tavita e pei ona alalaga ai tagata i lona afio atu i Ierusalem (Mataio 21:9). Ma o lona talitonuga lea ia Iesu, o le Faaola. Na fiu lava e vavao lana tualaga, e le’i solomuli lava, seia maua le mea moni o sailia, mai le Alii, e pei ona tautino e Iesu mulimuli ane. Sa fealualua’i solo lava le fafine, e saili se fesoasoani mo si ana tama teine, o tigaina ona o le temoni o uluitino ai. A e maua ai i lana vaai ma lana faalogo, o Iesu lea e vāvāō ai le aai, ona mulimuli ai lea ma aioi mo se fesoasoani mo lana tama ma’i (f.22).

E tele mea o ta’ua i le tala, e matuā lagona ai le mafatia faaletagata, pe ana o i tatou. Peitai o le fafine Kanana lea, o iina tonu o iloa ai, lona malosi ona o lona talitonuga, e leai a se isi o i silī, na o Iesu lava lea, e maua ai le mea moni o ia sailia.

Muamua: O ta’ua i le f.23, “*E leai se upu e tasi na tali atu ai Iesu i le fafine.*” O le faailoga o le lē amanaiaina, le leai o se ano ane i le tina ma lana aioi atu.

Lua: E fai o le leai o se ano ane o Iesu i le fafine, a e o loo māua i lana faalogo le tauanau e le au soo o le Alii, e tuli ese le fafine, “*Leaga e fai o le mulimuli mai ia tatou, a o le faatigā taliga o lona tualaga mai.*” (23).

Tolu: O le faato’a liliu ane o Iesu i le fafine – a e sau foi le faamatalaga, ua na o le faateteleina ai o le mafatia. Na fetalai atu Iesu i le tina, “*E le’i auina mai a’u i nisi, a e tau lava o mamoe o aiga o Isaraelu ua leiloa.*”

Fa: E aioi atu mo se fesoasoani, a e tali mai Iesu, “*E le tatau ona ave le mea e ‘ai a le fanau, ma lafo i ulī.*”

---

Talofa e, ua matuā tele ma matuā le matuitui o lenei mea ua tupu. A e ua o se mea noa lava i le fafine, auā e leai ma se foliga, e faavaivai pe solomuli ai. E ui lava ina maulalo, ma foliga ua ta'u maileiina ia i le fetalaiga a Iesu, a e o le tali a le fafine, e pei ona i ai i le fuaiupu o fai ma matua, o iloa ai le mau o lona loto talitonu i le Alii. Fai mai le fafine, ***E moni lelei oe Iesu! A o lena e te silafia, o mea na e 'ai e maile ma ola ai, o toe aiga po o nutigāmea, e totoe ma toulu ifo mai laulau a o latou matai.***

O loo fa'aalia i le toe fuaiupu o le Tusi faitau, le maofa o le Alii i le tele o le faatuatua o lea fafine; o lona lē solomuli, i le sailiga o le mea moni lava e tasi, o loo ia fia maua: **o le malologa lea mo si ana tama ma'i.** O le aliali tino mai foi lena o lona talitonu ma lona faatuatua moni ia Iesu. O Iesu e toatasi, e maua ai le mea moni o ia sailia, auā o Ia o le Faaola o tagata. Ona fetalai atu lea o Iesu i le tina, ***"E pei o lou mana'o, ia faapea lava ona faia ia te oe."*** Ona malolo ai lea o lana tama teine i lea lava itu aso.

O le faamanatu faaleTalaalelei mo tagata uma. O nei aso ua faigata. O le faatupulaia o le potu ma le atamai, o le tele vave foi lena o suiga o le olaga o tatou i ai nei, aemaise i le taitaiga ma pulega i totonu o aiga, nuu, galuega, le malo ma le Ekalesia. A o lea tele vave o suiga, o loo matilatila mai ai ma faafitauli ia: O le lē amanaia, le ta'ufaatauvaaina; le tulieseā, le faailoga tagata ma isi (tulou). 'Aua le fiu ma solomuli gofie, e mulimuli ma tauvalaau ia Iesu. O loo Ia faafogaina o outou i'uleo, ma na tapuaaoina lo outou ola. O mautinoa foi, le tali mai o le Alii mo so outou mapusaga, pe a outou talitonu ma faatuatua faamaoni ia te Ia.

Le Ekalesia tulou! O au faai'uga fai, o lau tali atu lava lena i le tualaga mai o tagata; po o fai ma toomaga, ma mea moni, o saili mai e tagata uma, pe na o se vaega? O Iesu lava Ia, e faigata ala o lo tatou saili atu ia te Ia! A o lana tali mai, o le alofa tunoa, o le mea moni lea o fia maua e tagata uma lava, e malolo ma ola ai e faavavau, e ala i le faatuatua. Amene.

**Saunia susuga Peteru Seiuli FS,**  
**Faatonu Lagolago, MAK.**  
**Ofisa Tutotonu Ekalesia.**

---

## **TUMAU I FOLAFOLAGA A LE ATUA**

*"19 Ua oo i le tau na taunuu ai lana afioga, o le afioga a le ALII na tofotofa ai ia te ia."* Sala.105.

Ina ua saeia e uso o Iosefa lona ofu felanua'i, o le faailoga o le alofa faapitoa o lona tamā o Iakopo ia te ia, o le ā le mea na ia taofiofi mamau le faatuatua o Iosefa? O folafolaga a le Atua ia te ia. Ina ua lafo ia i le lua ona faatau lea o se pologa, o le a le mea na ia taofiofia lona faatuatua? O le polomisi poo folafolaga a le Atua ia te ia. Ina ua galo i lana uo o le fale puipui ona faailoa o ia ia Farao, se a le mea na ia taofi mau i le faatuatua o Iosefa? O le folafolaga a le Atua ia te ia... "17 O Iosefa lea na faatauina e fai ma auuina. 18 Ua latou faatiga i ona vae i le noanoaga; ua oo lava o ia i le uamea; 19 ua oo i le tau na taunuu ai lana afioga, o le afioga a le ALII na tofotofa ai ia te ia. 20 Ua auuina atu nisi e le tupu e tatala ia te ia; o le na pule i le nuu ua faasaoloto ia te ia. 21 Ua na tofia o ia e fai ma alii i lona aiga, ma ia pule i ana mea uma lava. 22 Ina ia noanoa e ia alii na ia te ia i lana faitalia, ma a'oa'o atu i lona au faipule ia popoto." Sala. 105.

E tumau le afioga a le Alii e faavavau, peitai, ina ia mafai ona faataunuina, e tatau ia te i tatou ona tumau malosi i le faatuatua i taimi o tofotofoga. O le a tofotofoina oe i amio ma uiga o tagata o lou aiga, lou nuu ma lau aulotu. E tofotofoina oe i le lē faamaoni ma le taufaalata o au uo ma paaga e te talitonuina. E tofotofoina oe i le olaga o faigata ma faafitauli e foliga mai e tuufaafegai ma folafolaga a le Atua na fai mo oe. Ia e silafia lelei, e sili atu ona tāua i le Atua lau amio i aso leaga, nai lo lou ola fifilemu. *Ua oo i le tau na taunuu ai lana afioga...na tofotofa ai ia te ia.*

Aisea e tofotofoina ai? Ina ia saili ai pe agavaa, pe talafeagai. Ma, pe afai e te agavaa, ona mafai lea ona e tumau i le mea ua folafolaina e le Atua mo oe. Fai mai le perofeta o Sapakuka 2, *"Auā o le faaaliga ua tuuina mo ona aso ua tuupoina, a e tautala mai pe a oo i le iuga, e le pepelo lava; e ui lava ina tuai mai, a ia faatalitali pea i ai; auā e oo mai lava, e le faatuai mai."*

E au tupulaga o faatali le nuu mo le Mesia na folafola mai na te faaola le lalolagi. Na taunuu lava ina ua fanau mai le Pepe i Peteleema, a e na faasatauro i tuapa o Ierusalema. **F.Tolua**

---

# ***OSIGA FEAGAIGA EFKS SINAMOGA***

---

E lua faamoemoega tetele o le EFKS Sinamoga, Pulega Faleata Sasa'e o le Matagaluega Faleata, na faataunuaina i le Aso Faraile 29 Novema 2024. Na muamua le sauniga na osi ai la latou feagaiga, ma le susuga i le faifeau o Falesefulu Falesefulu FS ma le faletua ia Ve'ā. O le Toeaina lava o le Pulega, le Toeaina Faatonu o le Matagaluega, susuga Misipalauni Faatau FT na ta'ita'i le sauniga ma le osiga feagaiga. O le susuga i le A'oa'o Fesoasoani ia Tuiloma Faitasi Gae'e, o le Taitaifono o le Komiti Tupe a le EFKS, sa faia le molimau a le Ekalesia e tusa o la latou filifiliga. Na ia faaleo le faafetai i le Atua mo Lana ta'ita'iga, ua mafai ai ona i'u le faatofalaiga a le Ekalesia mo so latou tofi, talu ona penisione le susuga Larry Tofaeono FS ma le faletua ia Semurana i le tausaga talu ai. Na faafetaia foi le susuga i le Toeaina ma le Pulega i le faapalepale ma fautuaga, ina o faatuatuai le amiga o le faifeau, ona sa i ai nisi galuega tetele le ma'alofia sa feagai ai ma le Aulotu. Ui i lea, ua molimauina i lenei aso e le tuulafoa'iina e le Atua lana galuega.

Na saunoa foi le susuga i le faifeau ia Falesefulu i le viiga o le Atua ona ua Ia talia talosaga ma moomooga mo le fia galulue tausuu, e pei ona sa a'otauina ai. Na ia faafetaia foi le faatofalaiga a le Ekalesia i Sinamoga ona ua afe ane la latou tofa i o la'ua auaua faatauvaa. O lo la'ua mana'o foi ia latou galulue faatasi mo le manuia o le galuega a le Alii. Na ia faafetaia foi le tapuaiga a matua ma aiga, o matua faaleagaga ma Aulotu, tainane uo ma uso i le galuega. O le susuga a Falesefulu o le lupe faalele a aiga ma afioaga o Salelologa faapea Palauli, a o le faletua ia Ve'ā o le taulaga soifua a aiga ma le afioaga o Letogo. Na i'u le taumafai i Malua i le tausaga 2019, ona faia'oga lea i le Kolisi Maluafou.

O le au mautofi o le sauniga mamalu nisi o faafeagaiga taulagi o le Pulega Faleata Sasa'e. O le Failautusi o le Pulega & Matagaluega Faleata, susuga Amosa Reupena FS (Vaimoso) na saunia le tatalo e faapa'ia ai le feagaiga osia i luma o le Atua; o le Tusi Paia na faitauina e le susuga Fiso Lakisa (Lepea), o talosaga na ta'ita'iina e le susuga Faisiota Autagavaia FS (Alafua). O i latou na valaaulia e faafeiloa'i ma faatalofa, faamanuia

le faifeau ma le faletua, e aofia ai le afioga Taitaifono Fono Tele, susuga Tunumoso Soliola Iosia FT, Pouniu Faamausili FT (Faatonu Mtg. Aukilani), Toeaina Penisione ia Tavita Roma FT ma Tavita Anesone FT, Letaulau Pesaleli FS (na fai ma sui o le Pulega Faleata Sisifo, ina ua le auai le Toeaina ia Tautua Aurelio FT, ma le Failautusi ia Iosefa Afutiti FS sa feagai ma sailiga togafitiga), le Tiakono Toeaina Mataia Apisaloma ma le A'oa'o Fesoasoani ia Tuiloma Faitasi AF.

Sa folasia foi le le o le feagaiga na saunia e le Aulotu i Sinamoga e tusa o tu ma aga a le atunuu. O lauga o le sauniga na saunia e susuga Pati Crichton FS (Aleisa Sisifo) mo le faifeau ma le faletua, a o le faafeagaiga taulagi a le EFKS Ululoloa ma Siusega, susuga Kerisimasi Sani FS na lauga mo le Aulotu i Sinamoga ma le faapotopotoga. Na faaopoopo foi le ta'ita'i o le sauniga, e saga faalaei'au le faifeau ma lona faletua, faapea foi le Aulotu. Ona faai'u lea o le sauniga i le Sakarameta o le Talisuga Paia a le Alii na ta'ita'iina e le susuga Falesefulu Falesefulu FS.

Na mae'a le sauniga o le osiga feagaiga, ona soso'o ai lea ma le sauniga e faapa'ia ai galuega e lua sa feagai ma le Aulotu, o galuega sa fai ma faatuai, i le amiga o lo latou faifeau: (i) o le maota fou o le faifeau ma le aiga, (ii) o le faaopoopoga i le itu i luma o le malumalu tapua'i. O lenei sauniga sa faia lava i totonu o le malumalu, ona o le tulaga loulouā o le tau i lea aso. O le susuga lava i le Toeaina o le Pulega, Misipalauni Faatau FT na ta'ita'iina le sauniga. O le susuga i le A'oa'o Fesoasoani ia Tuiloma Faitasi Gae'e AF na saunoa i le Tala o le Galuega.

O le Maota o le Faafeagaiga na fausia e le T & T Construction, a o le Faaopoopoga o le Malumalu sa feagai lea ma le Mataia Construction; o konekarate sa filifilia lava i le auala o Tauofoga. O nei galuega sa fausia i le taimi e tasi, ma le faamoemoe ia mae'a faatasi, ia talafeagai ma le taunuu mai o le faafeagaiga filifilia. Na ta'ua foi e Tuiloma le tala faasolo mai o le aufaigaluega, sa latou faafeagai a o latou nopi'a i ai i le maota tuai, faasolo mai i le susuga Iupeli Poloie FT ma Larry Tofaeono FS talu ai.

---

**TALA O GALUEGA EFKS SINAMOGA:**

MAOTA O LE FAIFEAU (T. & T. Construction)	
Contract	\$245,800.00
Variation	<u>\$34,365.25</u>
	\$280,165.25
Scoria, Excavator, Retaining Wall	<u>\$57,275.00</u>
	\$337,440.25

FAAOPOOPOGA MALUMALU: (Mataia Cons)	
Contract	\$120,000.00

**TAU ATOA O GALUEGA E 2 \$457,440.25****OLONA FAATUPEINA:**

i. Nogatupe NPF	\$350,000.00
ii. Saofaga @ \$4,000 = \$72,440	
Lotu Faamanatu	\$17,670
Tausala	\$9,850
B. Materials	<u>\$1,300</u>
	\$101,260.00
iii. Lisi a le Vodafone	<u>\$6,180.25</u>

**AOFAIGA \$457,440.25**

O le afiga i le Taitaifono Fono Tele na saunoa e fai ma sui o le Ekalesia Aoao, e molioo le faamalo ma le faafetai, i le paia o le Ekalesia Sinamoga mo nei galuega tetele ua faia mo le Atua ma le Tala Lelei ia Iesu Keriso. E lē po malaē i le silafaga a le Atua, i nei galuega e faaopoopo i isi mau faiga taulaga, ua ulufia ai o latou aao ona o le faatuatua ua moni ma mausali. Ia saga faamanuia mai le Atua, e toe faatumu mea ua gaogao. Ona ia faamanuia lea ma tau'a'ao le meaalofa a le Ekalesia e \$20,000.

Na mae'a, ona tala 'a'ao atu lea o le faapotopotoga i fafo mo le tatalaina aloaia o ia galuega e 2. O le faletua o le Taitaifono Fono Tele, Susana Iosia sa ooti le lipine e aloaia ai, ma ulufale atu ai le au toeaina ma faafeagaiga ma le mamalu o le aofia, e silasila molimau i galuega o maota matagofie. Ona taualuga lea o le aso i osiga taulaga e ala i le tausamiga, o taumafataga ma fa'aalologa maualuluga masani faaleaganuu, na saunia e le Ekalesia lea sa tu tootoo ai le afiga i le Tiakono Toeaina o Faleata, afiga Mataia Apisaloma TT. Malo le galulue. Ia manuia tele le galuega a le susuga faafeagaiga ma le faletua, ma le Ekalesia.

**F. Tolua**

---

**FAAU'UGA KOLISI**  
**FAAFAIFEAU MALUA**

O le faau'uga o le Vasega Faai'uaso a le Kolisi Faafaifeau Malua i lenei tausaga, sa faataunuaina i le Aso Toonai 30 Novema 2024 i le Fale Iupeli. O le Taitaifono Komiti o Malua, susuga Asotasi Gu Time FT na ta'ita'i le sauniga ma saunia le lauga; o susuga Toeaina Faatonu ia Pati Vili FT na faitauina le Tusi Paia, a o Makerusa Porotesano FT na saunia talosaga. E to'a 27 le aofa'i o A'oa'o ua faai'uina le taumafai: 1 Diploma of Theology, 15 Bachelor of Theology, 11 Bachelor of Divinity with Honours. O loo aofia ai le A'oa'o toatasi mai le EFKT, ma le to'alua A'oa'o sikolasipi mai le Kiribati Uniting Church. Sa faapea foi ona faau'u ai ma le to'atolu i le faailoga o le Master of Theology (1 Faifeau tausinu & 2 A'oa'o Sikolasipi a le Ekalesia).

O le susuga i le Faifeau Pule, Professor Dr. Vaitusi Nofoaiga FS na saunoa i le Tala o le Galuega a le Kolisi mo lenei tausaga, ootoo ai le tele o faamanuiaga a le Atua mo le Laumua o le Ekalesia i lenei foi tausaga. O le faamanuaina o le 180 tausaga o le Kolisi (1844 - 2024) sa fai ia Setema. Ua faaopoopo mai faia'oga susuga Reupena Maulolo FS ma lona faailoga Foma'i (PhD), faapea A'oa'o o Tafatolu Tapaleao, Hobert Sasa ma Faafetai Korina ma faailoga o le Master of Theology - o le faailoga ua aloaia nei faavaomalo mo le ulua'i taimi i Samoa, e ala i le SQA. Ua amata nei le galuega o le Faletusi Fou o le Kolisi, i le nofoaga sa i ai le malae tenisi ma le A'oga Amata; o loo fausia e le kamupani Saina le New Era Construction, faamoemoe e mae'a ma tatala aloaia i le tausaga fou, ma ia fai ma pine faamanatu o le 150 tausaga o le Fono Tele i le 2025, pe a aulia i le alofa o le Atua.

Sa aafia le Kolisi i taligamalo mo le CHOGM ia Oketopa, faapea le tele o fonotaga sa auai atu i ai nisi o faia'oga, fai ma sui o le Kolisi/Ekalesia. O loo fa'auau pea le Malua Bible School, ua faaopoopo le lala i le EFKS Samalaeulu i Savaii. O le A'oga Amata, A'oga Faifeau, A'oga Aso Sa, A'oga ma Polokalame a Faletua, o loo manuia. Na laualuga i le lipoti a le Porofesa Foma'i le agaga faafetai i le Komiti a Malua tainane le Ekalesia Aoao mo lana tapuaiga ma le lagolagosua i faamoemoe o lana Kolisi. Ia manuia le Kerisimasi & Tausaga Fou. **F. Tolua**

# ***AU FAAU’U KOLISI FAFAIFEAU MALUA***

## **DIPLOMA OF THEOLOGY:**

1. A’oa’o: **Elisala Isaako**, Tausaga 29  
Nuu: Fakaofu, Tokelau  
Galuega sa i ai: Fai moli (Electrician)  
Matagaluega: **EFKT** (Fakaofu).

## **BACHELOR OF THEOLOGY:**

1. A’oa’o: **Afasene Falana’i**, Tausaga 36  
Nuu: Tanugamanono, Vaovai, Solosolo.  
Galuega sa i ai: Ofisa o Vaalele.  
Faletua: Taufu’a Tutaima, Tausaga 38  
Nuu: Lalomauga, Moataa  
Pulega: Purisipeni Saute  
MATAGALUEGA: **KUINISELANI SAUTE.**

2. A’oa’o: **Alipapa Ituau**, Tausaga 36  
Nuu: Lalomanu, Saleaamua, Lotopu’e.  
Galuega sa i ai: Faia’oga  
Faletua: Fofoaivaoese, Tausaga 38.  
Nuu: Saleimoa, Ulutogia.  
Pulega: Aleipata  
M/LUEGA: **LOTOFAGALEPA ALEIPATA**

3. A’oa’o: **Eucharist Faatau**, Tausaga 34  
Nuu: Savaia, Tafagamanu, Laulumoega, Fugalei  
Galuega sa i ai: Plumber  
Faletua: Melaina Faatau, Tausaga 35  
Nuu: Falelatai, Fasitoo-tai.  
Pulega: Faleata Sasa’e  
MATAGALUEGA: **FALEATA.**

4. A’oa’o: **Frank Faatau**, Tausaga 33  
Nuu: Savaia, Tafagamanu, Safotu,  
Vailoa Faleta.  
Galuega sa i ai: Meat Processor.  
Faletua: Akenese Faatau, Tausaga 33  
Nuu: Matautu Falealili, Vaivase, Samauga,  
Vaitele - uta.  
Pulega: Purisipeni Saute  
MATAGALUEGA: **KUINISELANI SAUTE.**

5. A’oa’o: **Fred Laban**, Tausaga 38  
Nuu: Luatuanuu, Lepa, Neiafu, Faleula.  
Galuega sa i ai: Swire Slipping (PFL)  
Faletua: Munioa Beta Laban, Tausaga 38  
Nuu: Luatuanuu, Siumu.  
Pulega: Vaimauga Sasa’e  
MATAGALUEGA: **VAIMAUGA**

6. A’oa’o: **Lance Jr. Tautiepa**, Tausaga 29  
Nuu: Faleasi’u, Falelatai, Fagafau, Moataa.  
Galuega sa i ai: Steel Fabricator  
Faletua: Tina Fiatamalii Tautiepa, Tausaga 29  
Nuu: Asau, Mulifanua.  
Pulega: Purisipeni Sisifo  
MATAGALUEGA: **KUINISELANI**

7. A’oa’o: **Lualua Manila**, Tausaga 45.  
Nuu: Faala Palauli, Lalomauga.  
Galuega sa i ai: Police Officer  
Faletua: Peata L. Manila, Tausaga 35  
Nuu: Lalomauga.  
Pulega: Anoamaa  
MATAGALUEGA: **APIA SASA’E**

8. A’oa’o: **Maccarios Malaefono**, 27  
Nuu: Faala, Iva, Tafua.  
Galuega sa i ai: Recording Producer  
Faletua: Mareta Malaefono, 27  
Nuu: Lefagaoalii, Safotu.  
Pulega: Palauli  
MATAGALUEGA: **FAASALELEAGA.**

9. A’oa’o: **Nuutasi Neria**, Tausaga 33  
Nuu: Lotofaga, Lufilufi  
Galuega sa i ai: Warehouse Dispatch  
Faletua: Hele Neria, 33  
Nuu: Matatufu  
Pulega: Manukau Sisifo  
MATAGALUEGA: **MANUKAU**

10. A’oa’o: **Peresia Muagututi’a**, 32.  
Nuu: Ulutogia, Lalomanu  
Galuega sa i ai: Pisinisi Pu’eata  
Faletua: Mary Muagututi’a, 29.  
Nuu: Vaitele-fou, Sapapalii.  
Pulega: Aleipata  
M/LUEGA: **LOTOFAGALEPA ALEIPATA**

11. A’oa’o: **Slam Opetaiia Samuelu**, 26  
Nuu: Gagaifolevao Lefaga  
Galuega sa i ai: Ofisa Fuainumera Faamaumuina  
Pulega: Lefaga  
MATAGALUEGA: **AANA**

---

12. A'oa'o: **Samuelu John Ah Sam**, 31  
Nuu: Vailele, Fagalii.  
Galuega sa i ai: Sports Development Officer  
Pulega: Vaimauga Sisifo  
MATAGALUEGA **VAIMAUGA**.

13. A'oa'o: **Sebastian Tuifao**, 31.  
Nuu: Matautu, Siufaga, Falelatai, Faga.  
Galuega sa i ai: Tree Lopping  
Faletua: Faotui Tuifao, 32.  
Nuu: Matautu Falelatai, Faleasi'u.  
Pulega: Purisipeni i Sisifo  
MATAGALUEGA **KUINISELANI**.

14. A'oa'o: **Talia Iati**, 37.  
Nuu: Tulaele, Lalomanu.  
Galuega sa i ai: Malu o le Malo.  
Faletua: Lise Iati, 33  
Nuu: Lalomanu.  
Pulega: Aleipata  
M/LUEGA: **LOTOFAGALEPAALEIPATA**

15. A'oa'o: **Vagatai Muaau**, 47.  
Nuu: Saleimoa  
Galuega sa i ai: Welder  
Faletua: Silive Muaau, 46.  
Nuu: Lotofaga  
Pulega: Canterbury  
MATAGALUEGA: **NIU SILASAUTE**.

**BACHELOR OF DIVINITY (BD) with  
HONOURS**

1. A'oa'o: **Aperaamo Apelu**, 33.  
Nuu: Fausaga Safata.  
Galuega sa i ai: Faia'oga.  
Faletua: Lautasi Apelu, 37.  
Nuu: Fatausi Safotulafai.  
Pulega: Safata & Siumu.  
M/LUEGA: **FALEALILI SAFATA SIUMU**

2. A'oa'o: **Aukuso Gasolo**, 34.  
Nuu: Papa Sataua.  
Galuega sa i ai: Faia'oga.  
Faletua: Luafata Simanu, 34.  
Nuu: Saleilua Falealili.  
Pulega: Itu Asau.  
MATAGALUEGA: **ITU O TANE**.

3. A'oa'o: **Caesar Utufua**, 42.  
Nuu: Apia, Falelatai, Moataa, Nofolii  
Galuega sa i ai: SSC, SSS, Tokelau Affairs.  
Faletua: Norah McCarthy, 39.  
Nuu: Apia  
Pulega: Apia Sisifo  
MATAGALUEGA: **APIA**.

4. A'oa'o: **Kaleuati Tusi**, 47.  
Nuu: Satupaitea, Vailele, Matatufu.  
Galuega sa i ai: Faia'oga  
Faletua: Faleulu L. Tusi, 42  
Nuu: Vailele, Uafato, Sauniatu  
Pulega: Vaimauga Sisifo  
MATAGALUEGA: **VAIMAUGA**.

5. A'oa'o: **Makesi Aiva**, 36.  
Nuu: Fogapoa, Vailoa Faleata.  
Galuega sa i ai: IT (SIFA)  
Faletua: Lauoi Lisa Aiva, 36  
Nuu: Salesatele Falealili.  
Pulega: Faleata Sisifo  
MATAGALUEGA: **FALEATA**.

6. A'oa'o: **Misioka Tanielu**, 38.  
Nuu: Vaivase-tai.  
Galuega sa i ai: Faia'oga.  
Faletua: Rosanna Tanielu, 45.  
Nuu: Vaitele-uta, Utualii.  
Pulega: Vaimauga Sisifo.  
MATAGALUEGA: **VAIMAUGA**.

7. A'oa'o: **Iuti Teeruka**, 32.  
Nuu: Temaiki, Kiribati.  
Galuega sa i ai: Chaplain.  
Matagaluega: Scholaship Student - **KIRIBATI  
UNITING CHURCH**.

8. A'oa'o: **Spencer Leuta**, 37.  
Nuu: Paia.  
Galuega sa i ai: Su'etusi.  
Faletua: Faafou Leuta, 33.  
Nuu: Fagae'e.  
Pulega: Gagaifomauga.  
MATAGALUEGA: **ITU O TANE**.

9. A'oa'o: **Terurunga Toaba**, 26.  
Pulega: Scholarship Student.  
**KIRIBATI UNITING CHURCH**.

---

10. A'oa'o: **Viliamu Eletise Su'a**, 39.  
Nuu: Tanugamanono, Pu'apu'a, Salani.  
Galuega sa i ai: Oloamanu Falepuipui & Faia'oga  
Faletua: Rosehill Eletise Su'a, 36.  
Nuu: Faleula.  
Pulega: Apia Saute.  
MATAGALUEGA: **APIA**.

11. A'oa'o: **Vincent Faafo**, 39.  
Nuu: Falevao, Sili, Lepa.  
Galuega sa i ai: Public Servant.  
Faletua: Matala'oa Faafo, 33.  
Nuu: Vavau, Ta'u Manu'a, Falevao.  
Pulega: Ma'a.  
MATAGALUEGA: **APIASASA'E**.

*(O le tala faanoanoa, e fai lenei lomiga, ua maliu le susuga i le A'oa'o ia Vincent, i le afiafi Aso Lua, 3 Tesema 2024. Ia faamaise le Atua i le faletua ma le aiga, le KFM ma le Ekalesia)*

### **MASTER OF THEOLOGY**

1. Suafa: **Peter Gafa Lokeni FS**  
Nuu: Vailima, Tanugamanono, Fagalii, Mangere East, Aukilani Niu Sila.  
Galuega: Tausi Nuu, EFKS Faatoialemanu.  
Pulega: Apia Sasa'e.  
MATAGALUEGA **APIA**  
Faletua: Tauvela Tualalelei Lokeni.  
Nuu: Vailoa Palauli, Faala, Vaipuna.

2. Suafa: **Fraser Tauaivale** (A'oa'o Sikolasipi)  
Nuu: Vaitoomuli, Salua, Vatia Aunu'u.  
Aulotu: EFKS Agape - Garden Grove.  
Pulega: Pulega Saute.  
MATAGALUEGA **AMERIKA**

3. Suafa: **Saleaula Reti** (A'oa'o Sikolasipi)  
Nuu: Fagalii, Savaia, Savaia Lefaga.  
Aulotu: EFKS Manono uta.  
Pulega: Aiga i le Tai  
MATAGALUEGA **AANA**  
Faletua: Moevasa Vaiaso-Reti  
Nuu: Manono, Auala, Toamua.

*Ia silafia:* O le lona 3 lenei o tausaga talu ona a'oa'o ina le Master of Theology. E amata atu i le 2025, o le a mafai ona a'oa'o ina online, a e i ai aiaiga faapitoa, ina ia auai i Malua, i taimi o le Fono Tele & Mafutaga Faafouina Aufaigaluega.

---

## **FAIGA TAULAGA 2024**

*“Ina fai taulaga ia i taulaga tataau, ma ia outou faalagolago i le Alii.” Sala. 4:5.*

Ua molimauina mai e le Ofisa o Tupe le tulaga manuia o Faiga Taulaga sa faataunuuina i lenei masina. Pe a aulia le Fono Tele 2025, ona faalauiloa aloaia lea o le Tala o Faiga Taulaga 2024, ina ua faamaonia e le Komiti Tupe. A o se vaaiga aoao tetele e tusa o i'uga o faiga taulaga, faavae i faamaumauga ua maua mai Faigame a Matagaluega e 10 i Samoa, e maua uma faasiliga o faiga taulaga a Matagaluega 2024, mai taulaga sa faia i le tausaga talu ai 2023.

Ia silafia o Faiga Taulaga i le 2023 (& 2022):  
Samoa = \$18,774,220 (2022: \$127,782,786);  
Nuu Ese = \$8,231,509 (2022: \$7,667,111);  
Au Taumafai = \$743,331 (2022: \$697,215);  
Au Leoleo = 754,875 (2022: \$698,862);  
O le Tuufaatasiga o Taulaga **2023 = \$28,503,935.**  
(2022 = \$26,845,975; faasiliga \$1,657,960).

O le tausaga talu ai 2023, na ausia ai le **Miliona Tala** e le **Pulega Safotulafai**, faapea le Matagaluega **AANA**, mo le ulua'i taimi. A o le tausaga nei **2024**, ua ausia ai lea fuainumera **Miliona** mo le taimi muamua, e le **Pulega Vaimauga Sisifo**, faapea Matagaluega **APIA**, Matagaluega **FALEATA**, ma le Matagaluega **FALEALILI SAFATA SIUMU**. Tau ina ia avea nei Taulaga, o Faasiliga, o Fuainumera faitau Sefulu, Selau, Afe ma Miliona, e fai ma viiga o le Atua o Le na Ia foa'i mai le 'oa ma tamaoaiga.

### **4 VENI FOU MO A'OGA**

Ua faatauina mai ni taavale fou se 4, le ituaiga o Veni 2024 Toyota Hi Ace, 15 nofoa sui kia lanu papa'e, mo le Matagaluega A'oa'oga Kerisiano, o le Kolisi Papauta, Kolisi Maluafou, ma le Kolisi Leulumoega. O le faataunuuina lea o le Iugafono a le Fono Tele 2024, na talia ai talosaga na ala mai le Komiti o A'oga ma le Komiti Au Toeaina, ma lagolagoina e le Komiti o Tupe ina ua silasila e talafeagai ma Tala Faatatau o Tupe, ma ua gafatia e le tamaoaiga o le Ekalesia o i ai. O loo i ai foi ma nisi taavale sa pasia mo nisi Matagaluega, ua fuafua e faatau ma taunuu mai ai i se aso o muamua. E fautuaina le vaai lelei!



---

## **GALUEGA EFKS** **MANUREWA, NIU SILA.**

*“Le Alii e, ou te vivii atu ia te oe, auā o oe sa ou malosi ai, o oe foi ua e faia mea silisili matou te maofa ai.”*

O le aso 18 Oketopa masina talu ai na faia ai le sauniga faapitoa, e faapa’ia ai galuega tetele sa feagai ma le EFKS Manurewa, o le Pulega Manukau Sasa’e, Matagaluega MANUKAU. O nei galuega: (i) o le Maota tele fou (Hall) **“Feiloaiga a Uso i le Talalelei”**, (ii) o le faafouina o le malumalu tapua’i, **“O le Afeafe Aupitoaluga”**. O le Toeaina Faatonu o le Matagaluega, susuga Anatu Reupena FT na ta’ita’i le sauniga, na auai ma molimauina e le afioga Taitaifono Fono Tele susuga Tunumoso Iosia FT ma le faletua, faapea le mamalu o le Ekalesia i susuga Toeaina ma faletua, o faafeagaiga, a’oa’o ma tiakono mai itu e fia o le Ekalesia aemaise lava i itumalo Manukau ma Aukilani Niu Sila.

O le Faafeagaiga Taulagi o le Ekalesia i Manurewa, le Toeaina o le Pulega susuga Talia Tapaleao FT (faletua ia Feiloaiga), na saunoa i le Tala o le galuega. Na ia ta’ua le amata mai o le fia faia o se maota fou e sui ai le fale tuai i le tausaga 2016; na saili le ata ma le tau e tusa ma le \$3 miliona. O le tula’i mai o le Faama’i Koviti 19 na tolopo ai fuafuaga, ma siitia ai le tau o le ata e oo i le \$4 miliona. Na toe saili isi ata, ma fai ai loa le galuega, i se nogatupe mai le Christian Savings e \$3 miliona, ma le fesoasoani mai le NZ Lottery e \$400,000. O le tau atoa a le konekarate e \$4,001,732, a e oo mai i le faapa’iaga, o le tupe ua tuuina atu i ai e \$2,630,307, a o le tau o le galuega ua i ai e \$3,243,778. Na silasila le Ekalesia ua fou le hall, ma ua talafeagai ai foi ona toe faafou ma le malumalu; o le tau na fai ai e \$120,000.

O le afioga Taitaifono Fono Tele na molia le faafetai a le EFKS i le Toeaina ma le Faletua, ma le EFKS Manurewa mo nei galuega tetele, faapea foi le soifua faitaulaga i le Atua, o le faaeaea lava lea i le molimau a le EFKS; na ia siitia le *Roma 8:28* o le mau e pine ai le auai mai ma le faamanuia a le Atua, i e alolofa ia te Ia. Ona ia tauaao lea o le meaalofa a le Ekalesia Aoa e NZ\$20,000 e tusa o ana faiga faavae. Malo le saili malo mo Iesu, le Alii o le Kerisimasi. ***FT***

---

## **O LE FEAU MO LE ASO** **Pese o le Olataga**

*“7 O oe lava lo’u lafitaga, e te leoleoina a’u i le puapuaga, e te siosiomia a’u i siva o le olataga.”Sala.32.*

Pe a oo mai puapuaga, e mafai ona tatou faasaga i le Atua ma lalafi ia te Ia. E faapefea? E ala i le si’osi’oina o i tatou i pese o le olataga. Fai mai le tamaitai faifeau tusitala o Ruth Ward Heflin, ‘E te pese ma vivii seia oo mai le agaga o le tapuaiga, e te tapua’i seia oo ina afio mai le mamalu, ona e tula’i ai lea i le mamalu.’ Ma o iina e ‘mafaia ai mea uma.’ Na fetalai le Atua ia Ieremia 1, *“12 Ou te mataala (sauni) ina ia faia A’u Upu”*. O Upu e aofia ai lana Afioga e faatino ma faaleo e auala mai pesega, musika ma mea faifaili.

O le kitara na fa’aaoga e Tavita e vivii ai i le Atua i auvaemauga a o ia leoleo i mamoe, o le kitara foi lena na fa’aaoga e le Atua, ina ia lavea’i ai le tupu o Saulo mai agaga leaga na latou saisaia o ia i ona faafitauli ma toatuga. *“23 A oo mai le agaga mai le Atua ia Saulo, ona tago ai lea o Tavita i le kitara, ua ta i lona lima; ona mapu ai lea o Saulo, ua lelei ai o ia, ua alu ese ai le agaga leaga ia te ia.” 2 Samu.16.*

Ma e lē na o le pau lena o le taimi na fa’aaoga ai e le Atua se fai musika ina ia fai ai ana vavega. Ina ua feagai le nuu o Iuta ma le malaia o le faaumatia ona o oge i aso o le perofeta o Elia, na valaau le perofeta, *“15 A o lenei, ia au mai ia te a’u se tagata ta laaupese. Ua na ta le laaupese, ona i ai lea i ona luga le aao o le ALII. 16 Ona fai atu ai lea o ia, O loo faapea ona fetalai mai o le ALII, Ia outou fai ni utu, ia soosoo utu le vanu nei.” 2 Tupu 3.* Na faatumuina e le Atua vanu uma i vai, ma tuuina atu foi ia te i latou le manumalo i o latou fili, le nuu o Moapi. Fai mai le tamaitai pese o Julie True, ‘I se tulaga faaleagaga, o le musika e sopoloa atu o tatou mafaufau, a e alu faasasa’o i o tatou fatu, loto ma agaga. Na te pa’i atu i totoga ma nofoaga e lē mafaia e se isi lava mea ona fai...O viiga ma pesega i tapuaiga, e tatalaina le lagi, ma faagaioi le fatu o le Atua.’ ***F.Tolua***

---

# ***O LE PEROFETA MULIMULI***

***(O le tala faafagogo ua faaSamoaia mai le tusi, The Last Oracle, tusia e James Rollins)***

Na liliu atu Nikolao ia Elena. “Ou te faamalie atu. Sa tatau ona ou ta’u atu ia te oe le mea e uiga ia Sasa ma Piota.”

Na lūlū malie le ulu o Elena, ua matuā ita. Sa le’i toe tautala atu lava o ia i le alii talu mai ana upu soona lafo talu ai i le Amerika. E oo mai nei lava, na o lona faatau pupula atu i fafo o le faamalama o le taavale. O Sasa ma Piota sa i ai so la’ua nofoaga faapitoa i lona fatu. Sa sili atu nai lo se lagona mafana e masani ai. Sa i ai foi so latou sootaga vavalalata. O le uso matua o Elena, o Natasa, na fanaua i laua uma, ma sa maliu ai o ia.

“Ua e iloa faiga faavae i le Uareni,” na oomi atu ai Nikolao a o alu ese atu le limosini i le auala.

“O faamaumauga o le fanauga o le tagata ua faamaufaailogaina.”

Sa avea ma faatonufofou mai le amataga i le Uareni. O faiā faaleaiga sa tele lava ina faalilolilo. Sa iloa e tamaiti o latou uso ma tuafafine moni, ina ia faavaivaia ai ni faigauō lē manaomia, a e na pau ai lava lena. O le faafeusuaiga ina ia maua fanau sa faatonutonu ma pulea e tagata popoto faapitoa i kenera.

Peitai o Nikolao sa le’i faafaiilele a’e o se tamaitiiti masani. Ona o se atalii o le alii na ia faavaeina, o se tala faasolopito fou atoatoa na fausia mo ia, amata mai i Iekaterinipeka, le nofoaga na fanaua ai o ia e lona tina i se falema’i, na fa’aaoga ai le faai’u sesē o Solokova. Sa tatau ona fa’aaoga e lona tina le suafa Romanova, peitai o le a mate’ia gofie lena. Mai le amataga, na faafaiilele o ia mo se taunuuga faapitoa. Ma ona o lena faamoemoe, na faaavanoa ai mo ia le tele o faamanuiaga.

“Na ou siakiina faamaumauga o fa’aautama i se tasi aso,” na ia fai atu ai. “Sa ou masalosalo pe na i ai ni a’u fanau. O iina na ou iloa ai o Sasa ma Piota o a’u fanau. Peitai na faasā a’u ona ou tautala i se mea.”

Na aapa atu lona lima i le tulivae o le tamaitai, peitai sa gatete lona alofilima, i le fefe e pa’i atu ia te ia. “O le upu moni, o le fanauina o nei tamaiti atamamai ma talenia, na faamalosa ai e lo’u tina la ma’ua mafutaga. O se taumafaiga ina ia toe maua ma saga maua pea nisi faamanuiaga faakenera.”

Sa le’i faasaga ane Elena ia te ia.

O se vaega o le tamaloa na fiafia i le toatamai o le tamaitai, i lona pulea. Na ia mana’o e pa’i atu, a e na te le’i faatagaina o ia.

“Faamolemole, *milala moia*, faamagalalo mai a’u.”

Na te le’i amanaiaina.

Ona ia mapuea lea, ma faataupulula atu i luma.

I faamalama o le potu tumaoti, na iloa atu ai e Nikolao le oso a’e i luga o Kerenopili. O se olo faavevela tu maualuga, o faataamilo ai fatāmanu mo lona faaleleia, o a’ea’e maualuga i le vanimonimo. Na ea a’e mai le faaputuga o fale sima. I se tasi itu sa tulai ai se poloka tele o uamea uliuli ma simā. Na foliga mai e susū, pei o loo afugia. E le o se misiterio le mafuaaga na ta’ua ai le fausaga o le Sarakofagu. Na foliga e pei o se tuugamau uliuli, ma o le ogatotonu i lona fatu na taatitia ai le faatafunaiga o le afi numera fa.

Ua uma ona vaai Nikolao i ata o le lotoifale i totonu, o se laufanua faatama’ia o simā ta’eta’ei ma u’amea gau. I se tasi o potu, sa i ai se uati, o le vaeluagalemu sa mu ma velasia, o se faailoga e faavavau e iloa ai le taimi na pa ai le pomu. I totonu o Sarakofagu, e silia ma le lua selau tone o uraniuma ma pulutonia o loo totoe ma tanumia i faatafuna o otaota, e mafuli o latou tino mai pei ni maugamū ua liu papa, na gaosia mai kasa oona faaleitiō o suauu, simā, ma le lua afe tone o kasa eseese. O nutiga otaota o le pomu na pa sa paepae solo, o nisi sa pipii solo i puipui i fafo. I itu aupito maualalo o le nofoaga, o vaitimu na tutulu ma le pefu, sa faaputupu ma fefiloi ai i le supo faaniukilia o kasa oona.

Pe o se mea e ofo ai, le tatau ai o se fofō fou?

O le itu tauagavale na taoto mai ai le tali.

E tele ma eseese igoa na lau silafia ai: o le Malu, o le Paolo o le Ola, o le Sarakofagu fou. O le fale foliga faaofuofu e fogafale tolusefulu fitu, na tula’i ma ea a’e i luga o le ea. O lona mamafa e sili atu ma le luasefulu afe tone, na taatia mai e sili atu ma le kuata kilomita le lautele, a o le afa lona umi. Sa mata’utia lona taufaafefe i totonu sa manatu inisia e ono gaosia ai ni ao ma timu ifo ai i totonu o le fausaga. I lalo ifo o le faaofuofu, na faatalitali ai masini ma lifi ma kololi faatonutonu, e talepe auaua’i i lalo le Sarakofagu tuai, o masini e faatonutonu mai e inisia o loo saogalemu i fafo o le Malu.

A ua amata ona faagaioi le fuafuaga.

---

O le fale faaofuofu atoa ua taatia ma faalagolago i luga o auala u'amea ua uma ona faasuau'u ma faaga'o, ma ua amata ona minoi lemu atu i luga o le auala, o loo toso e ni siaki eletise se lua. O se fausaga aupito tele lea ua gaosia e tagata. Ma e ta ane le sefulutasi i le taeao nei, ua toso atu le Malu i luga e ufiufi ai le Sarakofagu, ma faamau ai, i le isi itu tuaoi o taatia ai fale sima, ma faapulou atoa ai le nofoaga tuai, ma tapunia ai e faavavau se vaega o le tala faasolopito matagā o Rusia, a e faafeiloai atu i se amataga fou.

Sa fetau lava, o lea faamoemoe o le a fai ma faailoga o le amataga o le fonotaga o le a faia. O le fonotaga, paga lea, o le a lē taunuu.

Na sosolo atu le limosini agai i le laina taavale sa tutu i le itu i saute o le Sarakofagu tuai. Ua tutumu nofoa i le au valaaulia o tagata maualuluga. Ua amata ona fai lauga i luga o le tulaga sa faafesagai ma le nofoaga o tagata, e faasolo atu ai i le lauga aloaia tuufaatasi a Amerika ma Rusia, ua fuafua ina ia fetau lelei ma le faamauina mulimuli o Kerenopili. O le faagasologa o nei mea uma sa taimi uma i le uati ma le taimi e tulei ai le sau'ai faaofuofu.

E tusa ma le fuafuaga a Nikolao.

O sina minute o le fefe na emoemo faasolo i totonu o le tamaloa. E lē pei o se taimi na tu ai i luga o le pulelaa mo tala fou, a e pei o se fasioti tagata ua tula'i mo lona faasalaga i le fanaina. Pau lava o lea, o le tulaga lamatia o lenei taeao e faitau afe ona sili atu lona leaga.

Na papa'i mai tamatamailima ma opoopo i lona lima a o faataatia i luga o le nofoa o le taavale. Na ia liliu atu ma iloa le lima o Elena o i luga o loma lima. Sa pulaloo atu i fafo le tamaitai, o loo toatamai pea, e ta'u atu ai ina ia iloa e le'i uma le mataupu. Na faataamilo ona atigilima ma oomi malosi i lona alofilima, o se folafolaga e faasala o ia i se taimi mulimuli ane.

Na faalagolago i tua le tamaloa, a o oomi atili atu le tamaitai.

Na fesoasoani le tiga e faasagatonu ai lona tulimata'iga.

O luma atu, na tapuni lemu ifo ai le faa'ofu'ofu i luga o Kerenopili.

Na ia iloa le mea o le a tupu.

Ma o le mea moni lava, o ia ua tatau ona faasala.

10.04 taeao.

Na savalivali solo Karai i totonu o le sela, a e ona faalogoina le patatū malosi o le faitotoa. Na tau tu a'e i luga Koualasaki, a o Luka na tu sa'o mai le mea na ia faalagolago ai i le puipui.

“O le a le mea ua tupu nei?” na tomumu ai Koualasaki.

Na lagona le oloia o se uamea mafolafola, ma matala le au o le faitoto'a.

Na sitepu mai se tagata lapo'a ova mai luga o seevae o se leoleo i luga o le fola.

“Faanatinati,” na fai mai ai le tamaloa ma faasino mai lona tootoo au nifo elefane. “E fia ave'ese outou mai iinei.”

Na pulaloo atu Karai ma lona ofo tele.

O le tamaloa o Fomai Eiteni Matesone.

Sa le'i mautonu Karai, ma faamalō ai lana tu, ua le iloa pe manao e tu'i le tamaloa, pe faatalofa i lona lima.

Na faitau e Matesone lona te'i ma le faaletonu. “Lau susuga i le Ta'ita'i, ou te faigaluega mo le M16.”

“Leoleo nanā a Peretania?”

Na lue lona ulu ma le mapuea. “Faatali nisi faamatalaga. A ua tatau ona tatou o ese. I le taimi nei.”

Na aga'i ifo Matesone i lalo i le potu tele, ma tata'i atu ai ma latou. Na tu Karai ma na ave le meatau a le leoleo sa i lona itu, o se tama'i fana Rusia e ta'u o le Karaka po o le Ruku. O le tamaloa sa taia ma matapogia, o lona isu na lavea. E foliga mai o le tootoo o Matesone e lē o se mea na o le fa'aliali solo.

Na oo atu Karai ia Metesone. Na lagona le masalosalo i lona leo. “O oe? O se tagata o loo galulue faatasi ma le M16?”

Na tomumu Koualasaki i ona tua. “E lē o James Bond, a ea?”

Na setusetu atu pea Matesone i luma, a e na ia tepa atu ia Karai. “O le sa'o tonu, o le M16 ua litaea.” Na ia faamimigi ona tauau. “Pe afai tou te ta'ua lenei mea o se litaea.”

Na taofiofi pea Karai, peitai na te le'i mafaufau i se tulaga faaletonu i lenei tamaloa ua na faasaoloto i latou mai le sela.

Na fa'aaauu pea le televave o Matesone. “Na toe valaauina a'u ina ua ou i'u mai Okosefoti ma tuu ai e pou i Initia i le taimi na nofoia ai Afakanasitana e Rusia. Na ou litaea i le sefulu

tausaga talu ai, ona te'i lea ua ou lavelavea ane i lenei gaogaosā, ina ua ofo mai e se tasi tagata se tupe lelei ou te sipai ai ia Atipale. E le'i umi a e ou iloa o Rusia o loo i tua o nei mea. Ona ou faafesootai lea o le M16 ma ta'u i ai. O se mataupu sa faafaigofie. Sa le'i i ai se tasi na manatu o le galuega a Atipale o le a lamatia ai le saogalemu o le lalolagi. O le upu moni, sa ou le'i iloa foi. Se'ia oo ina ave faamalasia o ia ma uma ai lona ola i Uosigitone. Na ou taumafai e tutu se afi i lalo o le M16, peitai o ai e fia faalogo i se toeaina ua matua i nei aso? Sa lē mafai ona ou toe faatali. E mafai ona faapea o lo'u maeleelegā. Na ou masalo lava e i ai se mea tele mata'utia o loo faagasolo. O lea, ia malilie, ina ua leiloa Atipale, na ou fa'aogaina loa lea o outou uma ina ia faamalasia ai se faatomuaga."

"E fa'aaoga i matou," na fai mai ai Koualasaki. "Na latou fasiotia Api."

Na faamimigi Matesone. "Na ou taumafai e taofi i latou, peitai o la tatou uo sa fai lava si ona vavevave i lana pelu-sasa." Na ia lūlū lona ulu i le faanoanoa. "Atonu o le taaloga lenei a se tagata e talavou."

"A e faatali!" Na tautevateva Koualasaki i se mafaufauga faafuase'i. "Na e taumafai e fana a'u!" Na faate'a ese e Karai le mataupu. "Sa taumafai Matesone e faase'e ma faasesē."

Na lue mai. "Na ou taumafai lava ia talitonuina la'u taufaase'e."

"Ioe, na e matua'i faaseseina lava a'u!"

"A e o le laki lava ona sa ou mafaia." Na liliu atu Matesone ia Karai. "O loo fuafua le tamaloa leaga, e soloi ese le afa o ta'ita'i o le lalolagi i le asō."

"O le ā?"

Na tata'i i latou e Matesone i se auala faafasitepu sa i tala ane o le potu leoleo tuai ma musumusu fai atu. "E toatele isi o loo i lalo. Na latou taofia a'u i luga nei. Faapagota e pei lava o outou. O le a ou alu e faasaoloto Elisapeta ma Fomai Rosauo." Na ia tālo atu a o alu ifo pasi atu ma le potu leoleo. "Pe afai e mafai ona ou nonō maia la outou uō manaia lenei, o le a tatou taumafai e oo atu i se telefoni ma amata se aveesega."

"Ave foi ma Luka," na fai atu ai Karai. Na ia mana'o e aveese uma ma tagata sivili. E le gata i lenei, a o le i ai o le taitai o le Kipisi e tele sona aogā, o le a talitonu ai Rosauo o Matesone sa i luga.

Na lue atu le ulu o Luka e lagolago.

"Ua lelei. Ou te manaomia ma fa'aaoga lana fesoasoani," o Matesone lea. Na ia to a'e se uoki toki a le vaegaaau Rusia mai lona peleue ma avatu ia Karai, ina ia latou fesoota'i ai. "A e mo le taimi nei –"

Na faafelavei atu Karai. "– e tataua ona taofi Senatoa Solokova."

Na lue atu Matesone. "E lē atoa se itula o le taimi avanoa mo oe. Ou te lē iloa po o le a tonu le mea o loo ia fuafua e fai, o se mea e fesootai ma le sauniga e fai i Kerenopili."

"O le a le sauniga?"

Na se'i ane e Matesone se fasi pepa mai le taga o lona peleue, na fofola ma tuu atu ia Karai.

"O le a latou tapunia le Sarakofagu tuai i Kerenopili," na fai atu ma lue atu i le fasi pepa. "O loo i lalo o se fale faaofuofu uamea tele."

A o iloilo e Karai le fasi pepa, na tusi i lalo e Matesone le lisi o malo faaaloalogia ma ta'ita'i o le a auai i lea sauniga, ma na faailoa faafaanatinati le faasologa o le polokalame i lenei taeao. "A e mo le fuafuaga faalilolilo faapitoa a Nikolao, na pau le mea na ou maua o le igoa o le fuafuaga. O le Fuafuaga Uranusa."

"Fuafuaga O Lou Anusa?" o Koualasaki. "E leo tiga."

E le'i amanaia o ia e Karai, ma ia aga atu mo le sitepu. "O fea o i ai nei Solokova?"

"O loo ua alu atu i Kerenopili."

Ao alu ifo Karai i lalo faatasi ma Koualasaki, na ia maitauina atu le alaasu faamamā uamea maualuga. Po o le a le mea mata'utia o loo fuafua e le tamaloa amioleaga, e tataua ona aafia ai le afi. A o le igoa o le fuafuaga – Fuafuaga Uranusa – aisea na filifili ai lenei igoa? A o koloni o ia i le Ami, na iloa ai e Karai lona talaaga faasolopito mai ana suesuega faametoa o le taua. O Fuafuaga Uranusa o se osofaiga a Rusia i le Taua Lona Lua o le Lalolagi, na faai'u i se tasi o taua aupito toto masa'a i le talaaga o le lalolagi, le Taua o Setalinakerata. Aiseā la ua faaigoa ai i lenei igoa? Na i ai se mea na faalavelave mai i le mafaufau o Karai, se mea na 'ene'ene mai ia te ia, a ona o le vevesi, na poloka ese mai ai.

O luma atu, e toalua ni leoleo na i le ulufafo i le falepuipui. Na u mai o la'ua tua ia Karai. Na si'i a'e e Karai lana tama'i fana Ruki na gaoi mai.

O le a faatali le popole mo le taimi nei, se'i fai muamua mea e tataua ona faamuamua.

---

7 Setema, 10.07 taeao. Atumauga Urale i Saute.

A o susulu mai le la i se taeao pa'a'ā, na tolotolo atu Monike i le auala pefu e fepi'opi'oa'i i totonu o le aai aitu. O vao ma pupuvao na tutupu a'e tau i puimanava, na pei ai o latou asaasa atu i vai lanu meamata. O Konesetatio na pipii ane i ona autafa, a o Piota ma Kisika o sosoo mai. Na mulimuli mai foi Marata, peitai sa malemo atu i le sami meamata, o vaevaeina le vao a o ia fe'alofa'i solo i totonu.

“E itiiti le koale i le itu lenei o atu mauga,” na lauga atu ai Konesetatio i le va o lana mavava pei ni ponaivi ta'ei.

“O galuega 'eli maina uma i le laufanua o le su'ega o 'oa uamea.”

Na iloa e Monike o le tamaitiiti sa faauaea i le va o le vaivai ma le fefe. O le tama umi na tautala ina ia faaala ai o ia ma faafetaia'i le popolevale. “O kopalate, nikeli, tagaseteni, vanatiuma, paukite, palatiniuma...”

Na tuu atu e Monike ina ia faasasao pea ana tala a o ia vaavaaia le aai i ona itu e lua. O ona atufalega na foliga sa faanatinati le fausiga, na fau i laupapa patipati ma ona itu faatalalao e sisii na faaitualalua. Na latou pasia se falea'oga e tasi le potu ma ona faamalama tutu'i mau ma sa faalaina ai pea ni kesi laupapa i totonu. O ni loli tuai, lanu meamata Sovieta, sa tutū elea i le auala. O le fale piliki e tasi na i ai mataitusi fa'aatunuu i ona luma. Sa le'i iloa e Monike ona faitau, ae na foliga mai o se faleoloa po o se falemeli, i ona fata sa i totonu. Sa i ona autafa se falepia, o i ai pea ni fagu elea i ona fata.

E foliga mai peisea'i sa i ai se aso sa ulufafo ai tagata mai o latou fale, ma latou tuua le aai aunoa ma se toe tepa i tua.

Sa le'i tau mateina e Monike le mafuaaga. O le vaai atu i luga nei, o le Vai Karakei sa salalau lautele, puipua e auvai palapala ma faasusulu atu ai le malamalama i lona taatia mai, na natia ai lona fatu o otaota oona. Na tepa ane Monike i le pine sa tautau mai lana ato. O le lanu mūmū ua liua i le lanu pa'auli malosi.

Na ia siaki soo i taimi uma.

Na maitauina e Konesetatio lona popolega. “E le tatau ona tatou nonofo pea e sili atu i le itula. E lamatia tele iinei. E tatau ona tatou vave o ifo i lalo o le elele.”

Na lue le ulu o Monike ma ia faatau pupula a'e i luga. O le ulufale i totonu i le maina sa taatia e tusa o le maila i o latou luga. Na mafai ona ia iloa atu atufalega uamea ma auivi o fausaga sa latou faataamilo i se fausaga lapo'a atu na pei e fusifusi ma le mauga. E lua ni uili uamea lapopo'a sa la'ua faaitualalua i le fale ogatotonu, o uili si'usi'u, sa fa'aaoga e eli a'e i luga otaota mai eliga i lalo. O le auala pefu ma iliili e le mailoa pe na maua mai i le maina lena.

Na faanatinati e Monike la latou laa.

O luma atu, na pau le isi fausaga lapo'a na aliali mai a o liliu le auala i se pi'oga malō e a'e ai le isi laasaga i luga o le itumauga. O le vili na ea a'e i le maualuga o fogafale e tolu, o le maota aupito maualuga iinei. Na fausia i laau ma lona taualuga i apa. O lona uili vai laupapa, lanu meamata i limulimu ma pala, ua gausia lona taula ma sa taatia i autafa o le vai. Atonu o se tafega ua leva na motusia saoloto ai.

A o latou aga'i atu i ai, na valaau atu Kisika.

Na faliu atu Monike ma iloa atu Piota ua tu faamalō, sasa'o pei se pou, o ona mata ua pūpū lautele, ua manino i le fefe.

Na fefete le fatafata o Monike.

Leai, 'aua... 'aua le tupu mai iinei.

Na fusi faataamilo e Marata le tama, ua na lagona foi le fefe o le tama. E pei o Monike, na te le'i iloa le itu o taatia ai le fili o lama, a e poo fea foi o le a osofa'i mai ai – ae na la'ua tau fai iloa le mea ua lagona e le tama.

Na toe tomanatu Monike i tua i le taika na osofaia o ia, e tasi lona taliga na 'atia.

O Sakara.

Sa le'i tatau ona mafai e le manu ona mulimulita'i ia te i latou, i le lautele o le vai o ufitia ai le laueleele. Peitai o taika o ni manu e feausi malolosi tele. Atonu sa ausia e le taika le vai lopala ma faatalitali ai e osofai ana manu o saili iinei.

Sa le'i masalosalo Monike i le atamai faapea o Sakara. Na su'esu'e e Monike le vao uumi, le faaputuga o atufalega. E le mailoa le tulimanu o lafi ai le meaola. O laulu i lima o Monike ua fefete ma ua tutu, toetiiti lagona le pupula o mata o le fili ia te ia. O latou o loo i fafo i le laolao, o loo avanoa ma ua leai se lafitaga. Ma le leai o se auupega. Ua leiloa le latou auupega e tasi sa i ai ina ua osofaia e Marata ia Arakati.

***(O le a faia pea...)***

---

# **O E UA FAI I LAGI FOLAUGA**

## **SATOAFaIGA VA'AVA'AI**

### **SATOAFaIGA AF**

**(13/12/1948 – 14/1/2024)**

O le susuga i le A'oa'o Fesoasoani ia Satoafaiga Va'ava'ai na soifua mai i le nuu o Fagaitua, Tutuila, Amerika Samoa. Na soifua mai i le Aso Gafua, 13 Tesema 1948, a e maliu i le Aso Sa, 14 Ianuari 2024; ua 75 tausaga, 1 masina ma aso e 2 le matua o lona soifua. O ona matua o Soliniu Satoafaiga (tamā) ma Vaiala Faleileesi Satoafaiga (tina). O ona uso ma tuafafine e toasefulu i latou. Sa faaiipoipo atu o ia ia Siapo Amosa (teine foma'i mai Amanave) ia Ianuari 14 1989 i Las Vegas, Nevada. O le aofa'i o le la fanau e toafa. O le tama o Tialefoua ma lona toalua o Eleanor, o le tama o Cyrus ma lona toalua o Sammi-Lou, o le tama o Kenneth ma lona toalua o Angie, ma le teine o Jaylene. O fanau a fanau e toatolu teine (Mahala Renae, Joia Dawn, ma Dahila Ray).

O Satoafaiga o se fitafita/alii saila i le vaega a le Navy a Amerika. Ua litaea mai le Navy sa tautua ai mo tausaga e 20. Sa ia tauaveina le suafa matai o lona aiga i Asau i le suafa Satoafaiga ina ua tuumalo si ona tamā. O se matai e lelei i le aganuu ma le agaifanua. O ona tofi i le Ekalesia, o le Tiakono, A'oa'o Fesoasoani, ma sa filifilia foi o ia e le Matagaluega Amerika i le tofi Tiakono Toeaina (2011 – 2015).

O lona olaga galue i totonu o le Aulotu EFKS Ola mo Keriso i San Diego: O ia o se tasi o tagata sa i ai i le faavaeina o le Ekalesia i le amataga i le tausaga e 1999. O ia foi o le Taitaifono a le Ekalesia. E taunuu mai le faifeau, ua uma ona tapena e Satoa pepa uma o le lotu i le aai o San Diego ma le sitete o Kalefonia, aemaise foi le ID numerama mai le IRS e aloaia ai le Ekalesia e faatua i Amerika faaletulafono. Ua uma foi ona i ai le igoa o le Ekalesia (EFKS Ola mo Keriso – San Diego), sa faia lava e Satoa ma i latou na amataina le galuega. Ia o le fatu lea ua totō, a o le Atua lava ia e faaola.

E tele aogā o lenei auauna i le Ekalesia. O se auauna e tumu i le fa'aaloalo, e toa lona lotu ma

finau ina ia manuia le galuega. E tausi faifeau ma lima foa'i i le galuega a le Atua. E manatua pea o ia ona o lona sao aogā i le manuia o le Ekalesia. E maliu Satoa a ua maua le fanua ma fale e tapua'i saoloto ai le Ekalesia, faapea ma le maota o le faifeau. Ua leva ona faataotolia Satoa i le falema'i, ma e maliu Satoa o tausi o ia i le fale faapitoa mo tagata matutua.

Sa auai le Pulega i Saute i lona sauniga. Na matou lolotu faatasi ma le tamā ia Satoa i le Aso Sa i le sauniga a le Ekalesia (Fepuari 11, 2024), sa ou ta'ita'ia. Sa faitauina e le susuga i le A'oa'o Fesoasoani ia Tanu Tootoo le Tusi Paia, a o le susuga i le faifeau ia Iopu Amosa sa saunia talosaga. I lenei foi sauniga sa faapea ona fai ai molimau a aiga, aulotu, uo ma aumea mamae. I le aoauli i le itula e lua, na faia ai le sauniga a le Pulega. Sa ou ta'ita'iina le sauniga, a o le susuga i le faifeau ia Filo Tauaivale na faaulufaleina mai lona sa i totonu o le malumalu. O le susuga i le faifeau ia Tupe Auelua sa faitauina le Tusi Paia, a o le faifeau ia Filo Tauaivale sa saunia talosaga. O le susuga i le Toeaina mai le Pulega i Matu o Saitumua Tafaoalii FT na saunia le upu faamafanafana. O le faletua ia Siapo Satoafaiga na saunia le molimau autū i le la mafutaga ma Satoa, faapea foi le fanau, o uso ma ona tuafafine. O a'u na saunia le molimau i le soifua galue o Satoa i le Ekalesia. O ona toe sauniga mulimuli i le Aso Gafua, Fepuari 12, sa faia i le fanuatanu a le Navy i Miramar National Cemetery. O a'u sa ou ta'ita'iina ona sauniga i le tuugamau, ona matou faamavae atu ai lea ia Satoa i le pese aualofa a le Au Kerisiano, "Talofa uso e, tofaina oe." Faafetai Satoa ona o mea lelei ua e faia i lau Aulotu sa e galue ma auauna ai i le Atua. Manuia lau malaga.

Na matou toe foi i le fanua o le Ekalesia Ola mo Keriso mo le osiga taulaga a Aiga e lua e ala i fa'aaloaloga ma le agalelei i le auaigaluega ma le Ekalesia ma le mamalu na auai. Viia le Atua ma ia faamanuia atu le Atua. Ia faamaise pea le Agaga o le Atua i le tina ia Siapo ma le fanau ma aiga faapea le Ekalesia Ola mo Keriso.

**Saunia susuga Makerusa Porotesano FT,**

**Pulega i Saute,**

**Matagaluega AMERIKA.**

---

## **FIU MIKAELE PILI MASI**

**(11/3/1950 - 7/10/2024)**

O le Afioa i le Tiakono a le EFKS Sydney. O ia foi o le Tiakono aupito i matua o si a matou aulotu. Na maliu o ia ua 74 tausaga, 6 masina ma le 27 aso o lona soifua. Na faaipoipo atu o ia i le Faletua ia Faimasasa Lusua Fiu, ma e to'afā o la alo (1 tama, 3 teine). Na amata ona galulue mai i le tausaga 1996 ina ua taunuu mai i Niu Sila, a e faapaiaina lo la tofi Tiakono i le 1998. E valaauina o ia, ua tusa nei ma le 26 tausaga o tautua ai pea i lo la tofi Tiakono.

E ui e lei leva sa matou mafutaga ma le Tiakono ia Fiu, a e ua ou mataua o ia o se tamā finau ma tautua lotu. E pele ia te ia le Atua e manino i lana auaunaga i le Ekalesia. O le aiga aupito i mamao lenei o la matou aulotu a e ua le aveva lea ma tulaga e faavaivai ai i le auai mai i Sauniga Lotu faapea polokalame a le ekalesia. O se auauna lotu tele ma faatuatua i le Atua. Auā e ui ina umi se taimi na feagai ai ma gasegase o le tino, a e faamalosi mai lava ia matou Sauniga Lotu pe a tau maua lona malosi. E lē o se tagata e saunoa soo, a e ese le malie o ona uiga ma ana tala. O se tagata e tele ana taleni na fa'aaogaina mo le atinaeina o le galuega a le Atua. O le mea moni, o le a misia tele o ia e si a matou aulotu.

O ona toe sauniga sa faia i le malumalu o la matou Ekalesia i Lugarno, Sini Ausetalia, Aso Gafua 21 Oketopa, 2024 i le itula e 10am i le taeao. Sa taitaiina e le Faifeau Toeaina ia Iakopo Leleimalefaga FT o la matou Pulega Sini i Saute. O le lauga na saunia e le Faafeagaiga ia Fiti Semaia FS (Failautusi Pulega). O le Faafeagaiga ia Mofate Fuimaono FS na faitauina le Tusi Paia, ma Talosaga na fofogaina e le Faafeagaiga ia Pasefika Maiava FS. O a'u na ou faaulufaleina lona sa mo ona toe sauniga.

O molimau sa feagai ma le Faletua Malolo ia Sitaua Malifa, Sui o le Fanau, ma le Tinā ia Faimasasa Lusua Fiu. O a'u sa ou faia lona molimau faaleagaga e tusa ai ma lana auaunaga faapea ai ma la matou mafutaga i le aulotu. Na maea ona toe sauniga ona molimoli atu lea o lona sa i le Fanuatanu i Pinegrove Memorial Park,

Kington St. Minchinbury, NSW e lagomau ai. Sa ou faatinoina ona toe sauniga i le tuugamau ma matou faamavae atu ai lea i le Afioa i le Tiakono, o le toalua, o le tamā, o le tuagane, o le uso, o le uo, o le auauna a le Atua. Tofaina oe Fiu. Alu ia oe ma le fiafia i lou Matai o loo faatali mai. Manuia tele lau malaga.

**Saunia susuga Makesi Neemia (FS)**

**EFKS Sydney**

**Pulega Sini i Saute**

**Matagaluega NIUSAUELESE.**


## **MELE SELEISA**

*“12 Ou te faafetai atu foi ia Iesu Keriso...o le na faamalosi a'u, na ia manatu ua faamaoni a'u, i lona tofia o a'u i lana galuega.” 1 Timo.1.*

O Mele Seleisa (Mary Slessor) o se tasi o misionare ta'uta'ua i le tala faasolopito o le Ekalesia Perepereane i Sikotilani. Na fanau i le aso 2 Tesema 1848, i le nuu o Apetini i Sikotilani, ae maliu aso 13 Ianuari 1915 i Nigeria sa galue faamisionare ai. O se tamaitai na tupu mai se aiga mativa, aemaise o lona tamā o se tagata inu pia tele. O lona sefulutasi tausaga na amata galue ai pe a tuua le a'oga, e fesoasoani ai i lona aiga. O taimi ia sa maua ai avanoa e faitau tusi ai. O iina na ia iloa ai le nuu o Calabar, poo Nigeria ua igoa ai i aso nei, ma amata ai ona faaosofia lona fia alu e galue faamisionare ai mo le Tala Lelei ia Iesu.

O lona 27 tausaga na taunuu ai lana miti, aemaise ina ua oti le misionare lauiloa o Tavita Livigisitone na ia fia mulimuli ai i lana galuega. O le 1876 na malaga ai i le vaa o le SS Ethiopia mo Aferika; o le vaa na tumu i paelo pia. Fai mai lana tala, “Matua tele nei kalone uisikī, a e na o le toatasi le misionare.” A o se misionare uiga ese! O se faia'oga, foma'i, faaliliu upu ma gagana, sootaga e fai faaleleiga ma taofi taua ma misa, ma na faaliliu tagata faapaupau o atunuu e 3 ia iloa Iesu Keriso, i ana lauga ma a'oa'oga. E 40 tausaga o galue faamisionare ina ua tuu i ai le avanoa e le Atua e faataunuu lona naunau e aveva ma ana misionare. Ioe, e te mafaia foi! **F.Tolua.**

**SATO AFAIGA VA'AVA'AI**  
**SATO AFAIGA**



**FIU MIKAELE**  
**PILI MASI**



**MALUMALU FAAFOU & HALL FOU, EFKS MANUREWA**



**Susuga Toeaina Talia & Feiloaiga Tapaleao FT & sui Autalavou EFKS Manurewa.**